

**Govor predsjedatelja Zajedničkog povjerenstva za obranu i sigurnost BiH
Sifeta Podžića na sastanku s izaslanstvom Odbora za obranu i sigurnost i
Potodbora za obrambene sposobnosti i budućnost sigurnosti Parlamentarne
skupštine NATO**

Sarajevo, 16. travanj 2018. godine

"Poštovani gospodine Rebelo,

Poštovani predsjedniče Ali,

Poštovani članovi Podkomiteta za budućnost sigurnosti i odbrambene sposobnosti i
Komiteta za odbranu i sigurnost Parlamentarne skupštine NATO.

Drage kolege iz Delegacije Srbije – pridružene članice PSNATO,

Poštovane kolege, članovi Klegija Zastupničkog doma, članovi Klegija Doma
naroda, članovi Zajedničke komisije za odbranu i sigurnost, članovi Delegacije
PSBiH u PSNATO,

Dame i gospodo,

Pozdravljam Vas u ime Zajedničke komisije za odbranu i sigurnost Parlamentarne
skupštine Bosne i Hercegovine i u svoje ime.

Želim vam dobrodošlicu u Sarajevo i u Bosnu i Hercegovinu.

Zadovoljstvo je što ste učinili posjetu Bosni i Hercegovini i Parlamentarnoj skupštini
BiH.

Sa mnom su danas ovdje članovi Zajedničke komisije: Borjana Krišto, Bariša Čolak,
Šemsudin Mehmedović

Članovi Zajedničke komisije za odbranu i sigurnost se po pitanju stavova o NATO
integracijskom procesa razlikuju u viđenjima. Znam da moje izlaganje i stavove
neke od mojih kolega neće podržati. To je naša realnost i zato smo tu da tragamo za
zajedničkim rješenjima.

Vaša posjeta Bosni i Hercegovini dolazi u vrijeme kada raspravljamo o brojnim pitanjima koja su vezana za članstvo Bosne i Hercegovine u Evropskoj uniji i NATO. Očite su razlike u viđenjima našeg puta u NATO.

Učinjeni su pozitivni pomaci na putu prema EU, ali bićete u prilici sagledati šta smo zaista uradili i koji su to problemi sa kojima se suočavamo.

Zajednička komisija za odbranu i sigurnost je učinila jako puno na rješavanju problema i stvaranju pretpostavki koje nas vode ka EU i NATO.

Jedinstvene, profesionalne i dobro obučene Oružane snage BiH su se pokazale pouzdanim partnerom u Koalicijskim snagama u Iraku, u ISAF Misiji u Avganistanu te UN misijama i u novije doba EU mirovnim misijama.

Nama je ostala obaveza knjiženja vojne imovine na državu BiH.

Pokazalo se da je to u ovim okolnostima težak zadatak koji je otišao na politički teren. Mi zbog toga čekamo već osam godina početak aktiviranja Akcionog plana za članstvo - MAP. Tzv. Talinski uslov.

Mislim da je trenutak da sa našim partnerima iz NATO redefiniramo taj zaključak i da uvidom u realnosti na terenu konstatujemo da je proces uknjiženja vojne imovine krenuo te da ćemo kroz implementaciju MAP-a doći do željenog cilja.

Aktiviranjem MAP-a za Bosnu i Hercegovinu, NATO bi poslao snažnu poruku o našim dosadašnjim naporima i činjenici da proces više ne može stajati.

Mi smo se kroz Program partnerstva za mir pokazali kredibilnim i ovog momenta preformulisanjem preduslova za početak implementacije MAP-a, mi bi složene administrativne procedure oko knjiženja vojnih lokacija rješavali kroz izgradnju NATO standarda.

Zemlje iz regiona idu snažno ka NATO. Ne želimo ostati van tog kolosjeka jer kroz izvanrednu regionalnu saradnju mi smo se pokazali pouzdanim partnerom.

Prije dvije sedmice smo posjetili institucije zakonodavne i izvršne vlasti Republike Srbije. Razgovarali smo u Narodnoj skupštini Republike Srbije sa Odborom za odbranu i unutrašnje poslove i članovima Delegacije u Parlamentarnoj skupštini NATO.

Bio je to izuzetno dobar sastanak. U prijateljskom ozračju.

U Ministarstvu odbrane i Generalštabu Vojske Srbije smo sreli profesionalce i jednu potpuno novu i pozitivnu atmosferu. Primljeni smo srdačno. Pred nama su govorili profesionalci koji veoma odgovorno rade svoj posao.

Vrlo je jasno da Republika Srbija izuzetno dobro sarađuje i sa EU i NATO.

Gospodine Rebelo,

Drage kolege,

U parlamentarnom nadzoru sektora obrane smo postigli nivo sa kojim smo u cjelini zadovoljni. Svakako da problema ima i oni su prepoznatljivi.

U sektoru odbrane, Zajednička komisija je u okviru brojnih aktivnosti dala poseban doprinos u procesu transparentnog i zakonitog procesa uništavanja viškova naoružanja, municije i minsko-eksplozivnih sredstava, rješavanju aktuelnih problema u procesu nabavki, transparentnosti u vođenju personala, unapređenju sistema pomoći civilnom stanovništvu tokom elementarnih nepogoda i u kriznim situacijama, efikasnijem sistemu vojnog deminiranja te rješavanju aktuelnih problema vezanih za status nepokretne i pokretne perspektivne vojne imovine kao i niza drugih pitanja što je bilo često predmet rasprava tokom sjednica i radionica koje je organizovala Zajednička komisija.

Poseban angažman Zajedničke komisije je vidljiv u procesu praćenja i poboljšanja stanja sigurnosti u BiH, u insistiranju da nadležne agencije i Ministarstvo sigurnosti BiH definišu sigurnosne izazove i načine njihovom suprotstavljanju, u unapređenju nivoa međusobne koordinacije u radu, posebno tokom vanrednih situacija, te njihovom doprinosu boljem sigurnosnom okruženju i unutar Bosne i Hercegovine i u regionu.

Zajednička komisija je inicirala brojne rasprave pretočivši ih u inicijative s ciljem izrade i dogradnje strateških dokumenata koje je prevazišlo vrijeme u kojem živimo i radimo. Tu se prije svega misli na dogradnju postojeće Sigurnosne politike BiH, kao i dogradnju Strategije za malo oružje i lako naoružanje SALW koja je usvojena.

Imamo konkretne godišnje planove rada, koje nastojimo u potpunosti realizovati.

Znamo u potpunosti stanje u Oružanim snagama. Terenske posjete komandama i jedinicama OS BiH su redovne, korisne su i tokom njih izvlačimo konkretne zaključke i predlažemo rješenja koja su u funkciji izgradnje odbrambeno-sigurnosnog sektora. Posebno pratimo stanje ljudskih prava u Oružanim snagama BiH.

Imamo vrlo dobru saradnju sa OSCE Misijom u BiH, Komandom EUFOR-a, NATO Štabom u Sarajevu, Ženevskim DCAF, UNDP kao i sa nevladinim sektorom koji prate rad odbrambenog i sigurnosnog sektora.

Izuzetno smo zadovoljni i saradnjom sa parlamentarnim tijelima za odbranu i sigurnost u regionu. Kolege iz regiona nas u brojnim segmentima gledaju kao lidera. Na to smo ponosni.

Poštovani gospodine Rebelo,

Poštovani predsjedniče Ali,

Poštovane kolege,

Od vas očekujem pitanja i podršku u ispunjavanju obaveza koje nas vode ka evropskim i euro-atlanskim integracijama."